

UDHËZIM
Nr. 1, datë 15.4.2026

**PËR KRIJIMIN, ADMINISTRIMIN DHE VËNIEN NË DISPOZICION PËR
PUBLIKUN TË REGJISTRIT ELEKTRONIK TË EKSPERTËVE**

Në mbështetje të nenit 102, pika 4, të Kushtetutës së Republikës së Shqipërisë; të neneve 224/a, paragrafi i dytë, dhe 224/d, pika 1, të Kodit të Procedurës Civile, si dhe të nenit 7, pika 2, të ligjit nr. 8678, datë 14.5.2001, “Për organizimin dhe funksionimin e Ministrisë së Drejtësisë”, të ndryshuar,

UDHËZOJ:

I. Rregulla të përgjithshme

1. Pranë Ministrisë së Drejtësisë krijohet, administrohet dhe vihet në dispozicion për publikun Regjistri Elektronik i Ekspertëve.

2. Regjistri Elektronik i Ekspertëve mbahet në formë elektronike dhe organizohet në seksione, duke grupuar ekspertët sipas fushës së ekspertizës dhe vendit të ushtrimit të aktivitetit, në përputhje me juridiksionin territorial të rretheve gjyqësore.

3. Regjistri Elektronik i Ekspertëve përmban këto të dhëna:

I. numrin rendor;

II. numrin e protokollit dhe datën e regjistrimit;

III. gjeneralitetet e ekspertit: emri, atësia, mbiemri;

IV. adresën e ushtrimit të aktivitetit profesional: numri, rruga dhe qyteti;

V. numrat e kontaktit: numri i telefonit kryesor dhe dytësor;

VI. adresën e postës elektronike;

VII. fushën e ekspertizës;

VIII. numrin e licencës;

IX. datën e lëshimit të licencës;

X. datën e përfundimit të vlefshmërisë së licencës;

XI. autoritetin që ka lëshuar licencën;

XII. Numrin Unik të Identifikimit të Subjektit (NUIS);

XIII. vitet e përvojës profesionale;

XIV. vitet e përvojës si ekspert në gjykatë;

XV. gjykatat për të cilat eksperti është i disponueshëm;

XVI. shënime/komente, përfshirë të dhëna të nevojshme që lidhen me aplikimin;

XVII. datën e miratimit fillestar në regjistër;

XVIII. datën e rishikimit të ardhshëm;

XIX. statusin e regjistrimit, përfshirë fazën e shqyrtimit të aplikimit ose ushtrimit të ekspertizës.

4. Në Regjistrin Elektronik të Ekspertëve regjistrohen ekspertët për të cilët legjislacioni në fuqi parashikon licencimin.

5. Në Regjistrin Elektronik të Ekspertëve regjistrohen ekspertët që plotësojnë kriteret e mëposhtme:

i. të kenë zotësi të plotë për të vepruar;

ii. të kenë jo më pak se dhjetë vjet përvojë profesionale në fushën përkatëse ose të ngjashme, ose pesë vjet përvojë profesionale e këtij lloji, nëse aplikanti ka përfunduar trajnim profesional në fushën përkatëse;

iii. të jenë të regjistruar dhe të kenë përmbushur rregullisht detyrimet në organet tatimore;

iv. të mos jenë dënuar me vendim gjyqësor të formës së prerë:

a) për një vepër penale të kryer me dashje/nga pakujdesia, për të cilën nuk janë rehabilituar;

b) për një vepër penale të kryer me dashje, për të cilën janë rehabilituar, kur vepra penale cenon figurën dhe integritetin e profesionit të ekspertit, sipas përcaktimeve në legjislacionin në fuqi që normon ushtrimin e profesionit përkatës;

v. të jenë të pajisur me licencën profesionale përkatëse, sipas fushës së ekspertizës për të cilën paraqesin kërkesë për regjistrim.

6. Regjistri Elektronik i Ekspertëve publikohet në faqen zyrtare elektronike të Ministrisë së Drejtësisë.

7. Regjistri Elektronik i Ekspertëve plotësohet dhe përditësohet me të dhëna, në përputhje me legjislacionin në fuqi për mbrojtjen e të dhënave personale.

II. Kërkesa për regjistrim

8. Kërkesa për regjistrim në Regjistrin Elektronik të Ekspertëve paraqitet nëpërmjet portalit *e-Albania* në shërbimin “aplikim për ekspert gjykatë”.

III. Procedura e aplikimit

9. Aplikantët e interesuar për regjistrimin në Regjistrin Elektronik të Ekspertëve plotësojnë formularin e aplikimit *online* në portalin *e-Albania*, të shoqëruar me dokumentacionin e mëposhtëm:

i. jetëshkrimin;

ii. licencën profesionale për fushën përkatëse;

iii. vërtetimet e licencimit dhe kualifikimit;

iv. vërtetime pune për përvojën profesionale;

v. trajnime profesionale në fushën përkatëse;

vi. vërtetim nga organet tatimore për përmbushjen e detyrimeve;

vii. librezën e punës dhe dokumentacionin që provon pagesën e kontributeve shoqërore.

10. Në llogaritjen e përvojës profesionale merret në konsideratë e gjithë periudha e ushtrimit të saj, edhe nëse është ushtruar me ndërprerje.

11. Dokumentet duhet të jenë origjinale ose të njësuara me origjinalin dhe paraqiten nëpërmjet portalit *e-Albania*.

12. Për çdo aplikim të ardhur në Regjistrin Elektronik të Ekspertëve krijohet një dosje elektronike, në të cilën ruhen kërkesa e aplikimit, dokumentacioni shoqëruar dhe kartela e regjistrimit.

13. Ministria e Drejtësisë njofton aplikuesin për konfirmimin e marrjes së kërkesës së tij për regjistrim, në adresën elektronike të deklaruar në formularin e aplikimit *online*.

IV. Procedura e vlerësimit të aplikimit

14. Aplikimi dhe dokumentacioni shoqëruar, të paraqitura në mënyrë elektronike nëpërmjet portalit *e-Albania*, shqyrtohen sipas radhës së regjistrimit. Aplikimi shqyrtohet brenda 60 (gjashtëdhjetë) ditëve nga data e paraqitjes së kërkesës për regjistrim.

15. Gjatë shqyrtimit të kërkesës për regjistrim, struktura përgjegjëse kryen procedurat e mëposhtme:

a) në rast se aplikanti nuk ka paraqitur dokumentacionin e plotë, sipas pikës 9 të këtij udhëzimi, kërkon plotësimin e tij brenda 15 (pesëmbëdhjetë) ditëve nga data e njoftimit;

b) kërkon informacion shtesë dhe verifikim të të dhënave nga institucioni që ka licencuar ekspertin.

Në të dyja rastet, procedura e shqyrtimit të aplikimit pezullohet deri në paraqitjen e dokumentacionit ose informacionit të kërkuar.

16. Pas përfundimit të verifikimeve, struktura përgjegjëse përpilon një relacion shpjegues, në të cilin përmbledh të dhënat e dokumentacionit të paraqitur dhe vlerësimin mbi përmbushjen ose jo të kriterëve ligjore, duke sugjeruar pranimin ose refuzimin e aplikimit. Relacioni i paraqitet për miratim Sekretarit të Përgjithshëm nëpërmjet sistemit elektronik të Regjistrimit Elektronik të Ekspertëve. Në rast miratimi të aplikimit, kryhet regjistrimi i ekspertit dhe njoftimi i tij nëpërmjet portalit *e-Albania*, në adresën elektronike të deklaruar në formularin e aplikimit *online*.

17. Kërkesa për regjistrim refuzohet kur aplikanti nuk plotëson kriteret ligjore ose nuk paraqet dokumentacionin e kërkuar brenda afatit 15 (pesëmbëdhjetë) ditor. Në të dyja rastet, aplikanti njoftohet për shkaqet e refuzimit nëpërmjet portalit *e-Albania*.

18. Aplikanti, kërkesa e të cilit është refuzuar, ka të drejtë të paraqesë ankim pranë ministrit të Drejtësisë brenda 5 (pesë) ditëve nga marrja e njoftimit. Ministri shqyrton ankimin dhe njofton ankuesin brenda 10 (dhjetë) ditëve nga data e depozitimit të tij.

19. Pas shqyrtimit të ankimit, ministri i Drejtësisë vendos për pranimin ose refuzimin e tij. Në rast pranimi, procedohet me regjistrimin e aplikantit në Regjistrin Elektronik të Ekspertëve dhe njoftimin e tij, ndërsa në rast refuzimi, ankuesi njoftohet për arsyet e refuzimit.

V. Pezullimi/heqja e ekspertit nga regjistri

20. Në rast se ndaj ekspertit të thirrur në gjykatë paraqiten ankesa lidhur me sjelljen deontologjike ndaj gjykatës, apo palëve në proces, ose për mospërmbushje të detyrimeve profesionale/ligjore, Ministria e Drejtësisë kryen verifikimin e tyre, duke marrë të dhëna nga gjykata përkatëse mbi procesin gjyqësor në të cilin pretendohet se eksperti nuk ka përmbushur detyrimet e tij ligjore. Ministria e Drejtësisë i kërkon ekspertit paraqitjen e shpjegimeve lidhur me faktet e konstatuara. Në rast se konstatohet mospërmbushje e detyrimeve ligjore, Ministria e Drejtësisë procedon me çregjistrimin e ekspertit nga Regjistri Elektronik i Ekspertëve dhe njofton institucionin që ka licencuar ekspertin.

20.1. Eksperti i çregjistruar për herë të parë për shkelje deontologjike ose mospërmbushje të detyrimeve profesionale/ligjore nuk mund të regjistrohet për një periudhë 6-mujore (gjashtëmujore) nga data e çregjistrimit.

20.2. Në rast çregjistrimi për herë të dytë për të njëjtat shkaqe, eksperti nuk mund të regjistrohet për një periudhë 1- vjeçare (njëvjeçare).

20.3. Në rast çregjistrimi për më shumë se dy herë, eksperti nuk mund të regjistrohet për një periudhë 3-vjeçare (trevjeçare).

20.4. Në rast çregjistrimi për më shumë se tri herë, eksperti nuk mund të regjistrohet më në Regjistrin Elektronik të Ekspertëve.

21. Në rast se ndaj ekspertit vendoset një masë ndaluese në kuptim të Kodit të Procedurës Penale ose ai merret i pandehur në një proces gjyqësor, struktura përgjegjëse shënon statusin “I pezulluar” në regjistër dhe njofton ekspertin. Ky status ndryshohet ose hiqet në varësi të vendimit gjyqësor të formës së prerë. Në rast vdekjeje ose dënimi penal me vendim të formës së prerë, eksperti çregjistrohet nga regjistri dhe njoftohet për çregjistrimin e tij.

22. Në rast se eksperti largohet nga Shqipëria ose vendos të pezullojë ushtrimin e aktivitetit profesional, ai njofton Ministrinë e Drejtësisë dhe kërkon pezullimin e përkohshëm. Në këtë rast, në regjistër shënohet statusi “I pezulluar” dhe njoftohet eksperti për pezullimin e tij.

23. Ministria e Drejtësisë ka të drejtë:

a) të nisë procedurën e pezullimit të ekspertit, nëse vihet në dijeni të një prej fakteve të lartpërmendura në këtë udhëzim ose të një pengesë ligjore për ushtrimin e profesionit me karakter të përkohshëm;

b) të nisë procedurën e çregjistrimit, nëse vihet në dijeni të një prej fakteve të lartpërmendura në këtë udhëzim ose të mungesës së kriterëve ligjore të parashikuara në pikat 4 dhe 5 të këtij udhëzimi.

Në të dyja rastet, eksperti njoftohet paraprakisht dhe ka të drejtë të paraqesë shpjegime brenda 15 (pesëmbëdhjetë) ditëve.

23.1. Pas shqyrtimit të të dhënave dhe parashtrimeve të ekspertit, struktura përgjegjëse i propozon Sekretarit të Përgjithshëm pezullimin ose çregjistrimin. Vendimi i njoftohet ekspertit nëpërmjet portalit *e-Albania*.

23.2. Eksperti kundër vendimit për pezullim ose çregjistrim nga Regjistri Elektronik të Ekspertëve ka të drejtën e ankimit brenda 5 (pesë) ditëve pranë ministrit të Drejtësisë. Ministri shqyrton ankesën dhe njofton ankuesin brenda 10 (dhjetë) ditëve.

23.3. Në rast pranimi të ankimit, hiqet pezullimi ose bëhet reregjistrimi dhe eksperti njoftohet nëpërmjet portalit *e-Albania*.

VI. Procedura e korrigjimit të gabimeve

24. Pasaktësitë ose gabimet teknike, të cilat rezultojnë qartë nga dokumentacioni i depozituar dhe që nuk cenojnë vlefshmërinë e regjistrimit korrigjohen kryesisht ose me kërkesë të ekspertit.

25. Korrigjimet pasqyrohen në sistemin elektronik të Regjistrimit Elektronik të Ekspertëve dhe në rast kur kërkesa për korrigjim është paraqitur nga eksperti, ai njoftohet për korrigjimin e kryer.

26. Ndryshimet e të dhënave të pasakta, të cilat nuk rezultojnë qartë nga dokumentacioni i depozituar, apo që cenojnë vlefshmërinë e regjistrimit, kryhen nëpërmjet paraqitjes së një aplikimi të ri.

VII. Procedura e përditësimit të të dhënave

27. Ministria e Drejtësisë kryen, të paktën një herë në dy vjet, verifikimin e të dhënave për çdo ekspert, me qëllim çregjistrimin e atyre që nuk plotësojnë më kushtet ligjore, ose për të cilët ekziston një pengesë ligjore për ushtrimin e profesionit.

VIII. Sistemi i pikëzimit

28. Regjistri Elektronik i Ekspertëve parashikon një sistem pikëzimi, nëpërmjet të cilit palët e interesuara vlerësojnë ekspertët për punën e kryer.

29. Sistemi i pikëzimit është i aksesueshëm në faqen zyrtare të Ministrisë së Drejtësisë dhe realizohet nëpërmjet plotësimit të formularit përkatës elektronik në shërbimin “Vlerësim i ekspertëve në gjykata” në portalin *e-Albania*.

30. Ministria e Drejtësisë harton të paktën 1 (një) herë në vit një raport analize mbi të dhënat e sistemit të pikëzimit, duke evidentuar gjetjet dhe problematikat ndaj ekspertëve bazuar në pikëzimet e bëra, si dhe duke rekomanduar adresimin e tyre.

IX. Rregulla të fundit dhe tranzitore

31. Ngarkohet struktura përgjegjëse për administrimin e Regjistrimit Elektronik të Ekspertëve për zbatimin e këtij udhëzimi.

32. Udhëzimi i ministrit të Drejtësisë nr. 10619, datë 19.10.2018, “Për krijimin, administrimin dhe vënien në dispozicion për publikun të Regjistrimit Elektronik të Ekspertëve”, i ndryshuar, shfuqizohet.

33. Ky udhëzim hyn në fuqi pas botimit në Fletoren Zyrtare.

MINISTËR I DREJTËSISË

Toni Gogu